

### *Tha Mairead Nicleòid ag innse mun sgrìobhadair Robert Louis Stevenson air Radio nan Gàidheal.*

#### **Pàirt 1**

Rugadh Robert Louis Stevenson ann an Dùn Èideann air an treas latha deug den t-Samhain 1850. Bha teaghlach Stevenson ainmeil airson nan taighean-solais a bhiodh iad a' togail. An àite athair a leantainn dhan obair sin, thug Robert a-mach ceum ann an lagh ann an Oilthigh Dhùn Èideann.

Chuir Stevenson seachad mòran de bheatha ann an dùthchannan eile far a bheil an aimsir nas fheàrr na tha i ann an Alba. Bha e a' fulang le tinneas bho òige. Bha e an dòchas gun dèanadh an deagh shìde feum dha shlàinte.

#### **Pàirt 2**

Bha buaidh mhòr aig na h-àiteachan a chunnaic Robert fhad 's a bha a' siubhal air an sgrìobhadh aige. 'S ann mu thuras eadar a' Bheilg agus ceann a tuath na Frainge ann an canù a bha a' chiad leabhar aige. Nuair a phòs e, chuir e fhèin is a bhean seachad an ùine eadar an t-Suain, an Fhraing agus Sasainn.

Chaidh *Eilean an Ionmhais* fhoillseachadh ann an 1883. 'S ann leis an leabhar chloinne seo a dh'fhàs Robert ainmeil mar sgrìobhadair an toiseach. Sgrìobh e dhà de na leabhraichean as ainmeile aige anns na trì bliadhna às dèidh seo: *The Strange Case of Dr Jekyll and Mr Hyde* agus *Kidnapped*.

#### **Pàirt 3**

Sgrìobh Stevenson grunn nobhailean eile rè a bheatha a tha air an leughadh chun an latha an-diugh air feadh an t-saoghail. Dh'fhoillsich e cuideachd bàrdachd, sgeulachdan goirid, aistean, neo-fhicsean agus cunntasan air tursan a ghabh e.

Ann an 1888 thog e fhèin agus a bhean orra do cheann a deas a' Chuain Shèimh. Chaochail e an sin ann an 1894 's gun e ach ceathrad 's a ceithir bliadhna a dh'aois. Chun an latha an-diugh, tha Robert Louis Stevenson air a mheas mar fhear de na sgrìobhadairean Albannach a b' fheàrr a-riamh.

*Tha an earrann seo a' nochdadh anns an leabhar 'Fo Bhrùid' le Torcuil Crichton (Stòrlann 2010). Tha i air a h-atharrachadh.*